

VISITE HISTORIQUE DE CUCURON PAR ELIE LÈBRE. 9ème extrait

Elie Lèbre, agriculteur à Cucuron (1920-1991), a écrit et enregistré pour une émission radiophonique l'histoire et la description de notre village. Il se réfère aux ouvrages qui ont été écrits sur le sujet, notamment « Cucuron » de Maurice Taron (Luberon Nature, 1979). Le texte ci-dessous continue la visite du village à partir de la Mairie.

En contunhant de montar vèrs lo mamelon de Sant Michèu dempuei lo portau dau **Relògi**, arrivam sus una outra placeta, a la **crossiera** de cinc **carrieras**. S'**aplantam** un pauc pèr **espinchar** totei lei vièlhs **ostaus** que son encara **drechs** a l'ora d'ara.

Au **canton** de la carriera dei **Forns** amé d'aquela que monta au castèu, èra l'Ostau dei Forns, un que datava de 1584. Eisistava encara i a quauqueis ans. De l'autre **caire**, sus un passagi votat, es l'Ostau dich de la Rèina Jana. Es un dei pus vièlhs e dei mai curios dau vièlh Cucuron. Era un ostau nòble : avié un estagi **carnelat** que siguèt demolit en 1896 perce que menaçava de s'aboseirar.

Lei fenèstras a menaus que se nen ves encara lei contorns de chasque costat dau passagi cubèrt, la torrèla de la **viseta**, la fenèstra e lo fenestron barrats amé una **grasilha** de fèrre forgat meriton l'atencien dau vesitaire. Aquel ostau apartenguèt un tèmps a la familha d'Honorat de Boliers, mai siguèt jamai de la Rèina Jana. Ara es estat **crompat**, coma bèn d'autrei dins lo quartier, pèr d'estrangers amators de vièlhas pèiras que l'an restaurat.

Reprenem ara la carriera que monta vèrs lo mamelon monte i avié lo castèu, que siguèt **cremat** coma vos l'ai dich. A man gauche, lei roinas que vesètz son aquelei de la Confrarié dau Sant Esperit. A **drecha**, monte ara i a un jardinet, èra aquí que i avié la **glèisa** de Sant Michèu : n'en rèsta plus rèn. Arrivam ara dins la carriera que fa lo torn dau mamelon, qu'èra bordada d'ostaus de chasque caire. Ara n'i a plus qu'aquelei que facejon lo mamelon.

Vocabulari

s'aplanter : s'arrêter
canton : coin
caire : côté
carnelat : crénelé
carriera : rue
cremar : brûler
crompar : acheter
crossiera : croisement, carrefour
drech : droit, debout

drecha : droite
espinchar : épier, observer
forn : four
glèisa : église
grasilha : grille
ostau : maison
relògi : horloge
viseta : escalier à vis